

中華民國二十五年五月出版

重修正陽縣志

陳銘閣題

重修正陽縣志序

正陽爲吾豫名邑。在淮汝之間。詩云。遵彼汝墳。伐其條枚。旣見君子。我心則夷。是其地焉。余於前清光緒甲辰年。赴汝寧府童考。曾往返過其邑城。詢悉附郭有昔賢黃叔度故里。見其民俗渾厚。儼然有三代遺風。心低徊不欲遽去。便載邑產名酒一瓶。歸飲賓客。交稱佳釀。乙巳春。到省垣。考入簡易師範學堂。適與黎君勳卿同齋舍。是爲交識正陽人士之始。民國壬子春。由新蔡閻銘初君介紹。謁袁紹明先生於彰德軍次。談革命成功後。建設大業。頗有契合處。厥後政潮起伏。賴先生庇護之力。得免於禍。辛酉仲秋。應杭州人士約。奉師命。赴杭講學。得識陳守謙。胡恭安兩君。於砲兵營。

屢食宿營部。談道論德。不倦。旋兩君介紹。是邑知名人士。涂君聞欽。胡君峻甫。陳君海瀾。咸君麟齋。趙君紹宣等。先後入道德學社。同師事段師尊。一堂共學。交誼自異尋常。歲癸酉。聞欽學長以所督修之邑志見示。並請其邑宰劉炳華君。函聘爲總纂。自維淺陋。愧不敢當。而紹明先生。與守謙學長。復加責之。感於情誼。遂欣然參與體例之研討。詞旨之裁酌。其實全志內容。皆編纂諸君。及聞欽學長。全副精神所會萃而成。既付梓。因佩正陽士紳之熱心公益。並隨喜聞欽館長之興起一邑文獻。爲大有功也。因序其文字緣之所由結。云爾。

民國二十五年歲次丙子仲春古弦陳全三序於故都道德學社

重修正陽縣志序

志。記也。邑之有志。猶國之有史也。古列國記事。記言。後世踵而行之。體裁雖異。而編摩考據。證類核真。欲其信今而傳後。則未始有異也。吾正陽土厚水深。風淳俗儉。承學之士。類皆先德行而後文藝。自三代秦漢以來。先賢名儒傑人。畸士孝子。悌弟。貞女。節婦。載在邑乘者。斑斑可考。顧邑志失修已久。其間陵谷之遷移。時事之沿革。每不無今昔之殊。況夫潛德幽光。足以維持世風。增輝史冊者。又不可勝道。及今弗志。何以昭示來茲。後雖有著作長材。勤心蒐討。而年湮代遠。徵信無從。更何所據以成信史耶。余夙懷斯志。曩於光緒癸卯。丁母憂歸里。曾邀集邑紳。計議重修。會被項城袁公。檄召治軍。忽遽就道。事遂中輟。民國改建。時會艱虞。袁公秉政。畀以軍精重寄。夙夜在公。無暇及此。歲壬戌。余既解任農商部。稍有餘閒。乃命長子家驥。承余初志。再議重修。復以人事之變遷。干戈之擾攘。籌畫頻年。又歸停頓。幾經波折。至庚午夏。始由邑紳公舉涂君聞欽。出長志局。總司其事。聘吳少章。鄔子翔。潘益三。呂漁村。蕭屏亞。諸君。分任編纂。相與採

訪舊聞。摩挲碑碣。歷時三載。乃克成書。癸酉四月。聞欽親携全稿。暨邑宰聘書。遙蒞故都。專聘陳堯初先生爲總纂。並就商於余。及陳君守謙。趙君紹宣。李君羲原。諸同鄉。共歡迎堯初先生。卽時任事。遂相與秉筆裁核。修飾潤色。凡一易寒暑。而藏事。將付剞劂。邑人屬余爲序。余取其書而卒讀之。舉凡疆域。人物。風土。禮俗。以及選舉。建置。食貨。秩官。諸大端。凡爲舊志所未及者。無不博稽詳考。載列無遺。蓋自舊志失修以來。吾邑百餘年之歷史文物。至是乃燦然大備。不惟備裕徵文考獻之資。且可供問俗採風之助。懿與休哉。余既喜夫夙志獲償。尤願有志之士。勿狃積習。勿炫時名。相勉爲有體有用之學。以延吾邑先哲之墜緒於勿替。且以增志乘之光。是則余區區期望之深心也夫。

民國二十五年四月邑人袁乃寬序

重修正陽縣志序

吾正陽縣志。自清嘉慶重修後。迄今百有餘歲矣。歷時既久。遷變已多。況中經鼎革。體制復更。故實近聞。其有待繼舊志以留示方來者。正復何限。雖在清季民初之交。邑中

先達亦嘗有續修之議。顧皆以時事不順。未能實行。民國壬戌。袁紳紹明。倡議興修。設志局於黃公祠。公推楊紳子貞長其事。乃甫行草創。適城陷。楊紳遇害。事遂寢。越二年。袁公子俊伯。又邀葉紳友三任主編。商同劉紳錫爵。鮑紳紀堂。諸紳耆。籌款設局。中以縣局弗靖。廢於半途。迨民國十八年。士紳商請縣長。聘魏紳春源。任館長。兼膺總纂。旋阻撓於經費問題。莫由盡其展布。次年庚午。以越辛未。兩經官紳舉聘。涂紳聞欽。繼長館務。總纂一職。仍由魏紳春源遙領之。志時膺通館長其編纂採訪各職。仍由原聘各紳。分別擔任。初稿未就。而魏總纂病逝。癸酉之夏。志稿粗具。縣政會議。專聘光山陳堯初先生。繼任總纂。惟是時。堯初公方講學北平。而我縣又匪氛甚熾。難以寧處。遂公推涂紳聞欽。挈志稿北來。就正堯初公道席。相與商確參訂。積年累月。而全稿告成。今且付梓矣。是役也。起訖經二十餘年。集同志數十人。成書共十卷。始事之初。覃思體例。擬議進程。則葉紳友三。魏紳春源。相繼造其端。中更事變。竭力維持。俾有始卒。則陳紳虞薰。委曲運其機。及其後也。徵文考獻。清釐本末。綜合羣策羣力。勞瘁不辭。以期衷於至當。則涂

紳聞欽。肩其難而竟其事。至若不棄僻陋。嘉予潤色。俾區區邑乘。得託文采。以垂見於世。斯則堯初先生之雅惠。尤爲我邑人士所感荷。難忘者也。銘閣比年以來。世務牽率。對此名山事業。愧未能稍盡棉薄。然樂與有成之心。則又未嘗敢落人後。故於剞劂。既竟之餘。特爲述其緣起。及前後經歷如此。不惟用識欣佩。亦冀後之來者。知諸公今日護持文獻之功。爲不可沒云。

中華民國二十五年夏六月邑人陳銘閣敬序

重修正陽縣志序

民族之文化。作自先聖。而述於後賢。孔子刪訂贊著。本先民國史之記載。用集我華族文化之大成。此所以爲萬世師也。縣之有志。卽國史之縮影。志缺久不修。司文化之後學。不負其責。責將誰歸。則舜學識庸庸。忝領我正教育有年矣。視事伊始。值志局再興。再蹶之餘。其與是役者。或觚未操。而城陷長隰。或稿甫編。而兵燹流離。百餘年待舉之文獻。幾摧殘於暴雨狂風。而莫敢再問。則舜以業務所在。良心主張。不敢放棄維持文

化之天職。曾於民國己巳。商同劉縣長宗琨。敦聘魏君春源。組局開辦。不數月。遭魔停廢。人幾疑縣志不復能修矣。則舜迂不畏怯。庚午春。又同紳學全體。商請劉縣長月泉。敦聘涂君聞欽。任館長主編。乃辦理未幾。又遇事變。停辦近一年。志運與抑縣運與。何刼之重耶。辛未歲。事平。縣政恢復。各機關同人。對於志役。再接再厲。公同周縣長飲眞。復聘促館長涂君。招集編纂採訪各職員。重整旗鼓。奮厲進行。越二年之慘淡經營。全稿於是乎就緒。其中雖館穀多艱。糧謀煮字。個人誤會。風送流言。而負責諸同人。終不以口體之困難。影響之猜嫌。少隳撰述工作。致負官民公意之付託。癸酉夏。以陳總纂堯初公。不暇蒞縣。又公推涂館長。携稿赴平。就正纂定。且便付印。復以印費濡滯。遲遲三年。今幸陳君守謙。慨捐義囊。袁君紹明。趙君紹宣。多方贊助。付印成書。我正陽歷來掌故。始得有具體之表現。信乎文化之繼述發皇。若是其難也。則舜謬膺協纂。愧少補益。竊幸維持文化之初心克償也。用應同人之囑。而述其實。

中華民國二十五年五月邑人陳則舜謹序

重修正陽縣志序

正陽襟淮帶汝。位汝南中心。事蹟民物。多可記載。志乘洵不可缺也。嘉慶舊志。尙餘殘版。惟在古爲愼。爲沈。前無詳考。以演混愼。豕亥多嫌。其他待補正者猶多。且失修百有餘歲。文殘獻謝。實大堪虞。重以國體變更。事多懸殊。及今不修。久益難徵。邑人士之汲汲擬修。不亦宜乎。民國壬戌秋。袁紳紹明。倡議重修。甫經著手。阻亂旋停。維時佩薰濫竽財務。附理善後。收拾燼餘。無着遺款。商同劉君錫爵。袁君俊伯。暨紳耆各界人士。存作修志經費。越年甲子。志稿編就大半。又遭暴亂。飄零殆盡。迨己巳庚午。迭經教育局長陳君虞薰。商得官民同意。舊事重提。均阻事變。旋起旋止。未得結果。今者新志全稿。業經陳總纂堯初公。筆削纂定。排印成書矣。志館長涂君聞欽。函商運書。分配辦法。並囑爲序。初聞而喜。一迴思。而不禁慨然也。溯此次興修。爲時將七年。庚午阨於兵匪。停頓十閱月。辛未阨於匪共霖雨。障礙採訪者五六月。壬申。則一撓誤於災荒流亡。再橫梗於疫厲天札。自春徂秋。幾無寧日。尤有難者。疏水維艱。枯毫無力。甚有一二已見。隱

隱波折。而任事各同人。竟能堅忍沈毅。徵文考獻。克觀厥成。俾正陽千百年之潛德幽光。統舊志所已載漏載者。同耀新彩於簡冊。先難後獲。不其然乎。旅平袁陳趙阮劉李諸公。目睹當事人誠勉苦勞。力竟此役。咸相與助力捐貲。成此一簣。爲吾邑光。當亦父老兄弟所共樂許也。獨是此志自癸酉脫稿。祇以印費空籌。牽延數年。佩薰忝司財務。無能爲力。此心殊抱不安。所幸此中隱曲。堪爲邑人共諒爾。

中華民國丙子年五月邑人鮑佩薰序

重修正陽縣志序

史乘之興。蓋以備得失之林。而裕考鏡之資。故採詩錄十五國風。而得民俗盛衰之象。刪書存虞夏商周。而知政治升降之由。古帝王堂階不下。風化自彌綸宇宙。夫豈無據而能然哉。正邑背汝面淮。風土人情。自有其特殊可紀之優點。况睢麟雅化。渥被汝墳。則文謨武烈之漸摩。必猶有悠久而成善良習慣者存焉。祇以明初遺黎寥落。縣廢一百三十四年。此時併入汝南。志無專書。缺略不備之事蹟。不知凡幾。迨正德乙亥。學博

張恕始草創縣志。嘉靖壬寅、乙卯一再續修。清順治、康熙又續修二次。其書皆不可見。第觀現存之嘉慶志。係根據康熙志而重修者。尙不少挂漏疑誤之點。其前此者可想而知。誠以時際閉塞。書籍少。交通滯。又限於專制束縛。欲舉伊古來之陳蹟故實。方百里之風土民物。暢行搜攬。於稽其詳。蓋亦難矣。近世風氣大開。文明煥發。參考之著作繁興。郵電輪軌之往復。亦甚靈捷。於此而欲考古證今。爲較詳之記載。固稍易於前代也。是以我正斯志。於沈、摯、慎、江各國之故址。安城、白狗、臨淮、建安等古城之遺蹟。莫不溯源由來。爲建置上形勢之比較。於大禹排決之淮汝。酈道元水經注之上下慎陂。唐元和之龍陂。宋治平之青陂。及清、白、慎、閭各河流湖港。莫不詳其利害。爲疏濬整理之導源於祖己、太任、摯子、孟宗、周氏等各名族。莫不述其里墓歷史。爲邑人觀感之芳型。他如土質物產之宜。習俗風尚之性。水陸津梁之要。學校文化之趨。清嘉道後政治之設施。盛衰治亂之樞機。及一切舊志所遺。或譌誤者。均莫不撮記要領。綱舉目張。臨是編者。考其旨趣。鑑其得失。因時制宜。官可資以布化。而漸臻上理。民可資以立業。而樂享

太平。則斯志豈非輅軒所樂採。邑人士所欣賞者歟。吾友涂君聞欽。不憚困難。委曲負重。和我同人。力完此稿。又備經艱苦。携就總纂陳堯初君於北平。業筆削成書矣。將付梓。而問序於余。余嘉其能相與有成也。故不揣麤昧而述之。

中華民國二十五年歲次丙子四月邑人呂兆璜撰

書重修正陽縣志後

中華民國丙子夏。校印正陽縣志。工既竣。同事同鄉諸君子。責以爲序。昭翔實。夫修志之大端情形。前席諸公各序。已言之昭昭。無須多贅。惟揆諸茲志運會之所繫。義務之所寄。工作之成始成終。與其中之實在所得力。諸序未之盡詳。濟又不應竟無一言也。憶自庚午奉聘。自問棉薄。初不敢冒昧參與。迴溯舊志失修。百三十餘年。文獻早慮難徵。況民國乙卯、壬戌、甲子、己巳各年。議修志者四。濟均蒙官紳不棄。曾經與聞。茲又以志役見責。意或義務之不容已者乎。遂兢兢焉勉膺厥命。乃開辦無幾。縣局倏變。濟於是時。卽知難而退矣。再閱月。同人函稱。袁師長同縣長。提倡修志。囑速招集進行。濟當

以病難任事辭。實行退避賢路。而志局竟擱淺歷十月。終未改組。

時各機關完全更動

辛未春。縣

局恢復。官紳各界。又本功令公意。一再催促。濟於是欲終藏拙。於義有所不能。乃重集同人。積極辦理。而此心則戒慎恐懼。時虞隕越。爲吾道羞。幸邀官府倡督之功。縣內外同仁協助之力。各同事。悉心結撰之勞。兩閱春秋。編稿粗就。歲癸酉夏。濟又奉縣政會議使命。携稿來舊都。聘陳堯初學長爲總纂。相與稟承師訓。陪侍丹鉛。全稿遂得觀成。是役也。非陳君虞薰之始終主持。隨時贊襄。則茲志無動力。非鮑君紀堂。趙君竺輿。張君杏村。史君體元。諸同仁之調劑維護。則茲志無援力。非陳君堯初之中和純正。秉筆公允。則茲志無定力。非袁君宗宣之搜集殘稿。則茲志無補力。非呂君漁村之艱苦與共。蒐討舊聞。則茲志無實力。非袁君紹明。趙君紹宣之委曲玉成。陳君守謙之後盾堅強。仗義捐印。則茲志無毅力。若茲志之完全主力。大力。則爲劉主席經扶公。迭令督催。並蒞縣。嚴令籌印。爲效尤多。是皆有大造於正陽文獻。深堪欽崇而感佩者也。尤有難忘情者。修志歷屆同人。若楊君子貞。袁君俊伯。郭君子謙。阮君述岑。胡君子淮。鮑君際。

川。魏君春源、理卿。卓君子貞。吳君少章。傅君楷堂、不勳。王君遠大、協堂。江君紫垣。彭君鶴亭。劉君雲峯。李君子元。涂君子良、育博。葉君駿藩、幼庭。張君憶銘。梅君錫九。陳君體仁。袁君錦堂。李君子光。濟濟羣公。曾勞勞於訪編諸工作。未及見新志成書。竟先後溘然長逝。濟也、譚陋而迂。忝附載筆諸君子後。於茲志無甚補益。竊倖始終其事。了此一段文字。因緣迴思往事。曷禁黯然。蓋至是。益不勝慄慄然懼。涔涔然淚矣。所幸中經重艱窘。困頓越六七年。確視爲應有過程。祇再三自反。藉減夙戾。初未嘗稍萌歧念。自外斯文。是則濟與同人。差堪自信者也。後有著作名賢。尙望匡我不逮。彌缺糾正。不激不隨。無違先聖懼以終始之義。非獨正陽之福。實世道之大幸。況世運循環。道有主宰。吾邑安圻舊志。成於康熙丙子。世運昇平百餘年。今茲志亦遲至民國丙子而始成。或亦世道之轉機。未可知也。惟吾邑人國人。同修德以致之。侯其禕爾。

中華民國二十五年六月二十四日邑人涂幹濟書於舊都中和堂書齋

重修正陽縣志凡例

一 茲志興修。起於縣政府遵奉省令。聘任館長。設館組織。原稱志局。民國二十年。省令改局稱館。經官

紳、學界、會議公決。設館長一人。總纂一人。編纂五人。校正一人。文書主任一人。採

訪十六人。庶務一人。書記二人。酌加。事繁時分任負責。名譽協纂二人。隨時襄助館務。

一 茲志體例。及撰述主旨。均遵照省頒各縣市修志條例。並參酌內政部頒修志概要。徵據地方事實。辦理之。但志之爲義。旨在啟人善機。俾志于善。故志善不志惡。與國史褒貶並重。不同。其有事關大局。不能爲諱者。亦遵不爲已甚之意。閱者諒之。

一 正陽縣志。自明歷清計修六次。此時搜集舊編。採作依據。不惟明正德時。張恕之創著。嘉靖時。焦濟何麟之續撰。湮沒無存。卽清順治劉必壽。康熙安圻二志。亦杳不可得。幸嘉慶丙辰彭良弼重修志板。經印刷吏收藏。無大缺殘。尙可據作底本。茲志所稱舊志。卽指此書。

一修志一事。職在稱先。非博涉典籍。無以資考鏡。而審體制。正邑舊鮮藏書。匪燄殘餘。斯文益墜。借觀末由。新購財絀。不得已而謀及遠方。首由徐君顯庭、鄔君仰素、由汝南借來汝寧府志。汝上、遂、確、信、羅、新各縣志。一經核稽。本縣事跡。得各志互證。而益明。旋而郵送名志三部來。曰上江合志。曰常昭合志。曰餘姚縣志。則陳君守謙。寄自首都也。詳加披覽。擷其精華。茲志之起例選材。遂得標準。史君又青。及郭宅。又資以大清會典、龍門史記、通鑑輯覽等書。於是乎古事近例。均有所考查。茲志之得備大體。勉底於成者。多仗邑同仁之熱誠惠助云。

一縣志於民國十一、十三、十八、十九、四年中。曾開局興修。均規定上接嘉慶志續修。二十年開辦伊始。仍依原議續修。嗣因查舊志疆域沿革各門。證諸事實。並參考汝寧府志及史地等書。始知縣屬主要事蹟人物等類。多須補錄。又參考上江等名志。知體例門類。亦應審正。於是遂改續修爲重修。舊志所有優點。完全照錄。缺者補之。訛者正之。其原板原書。仍保存備考。

一 茲志原議續修。歲時起自嘉慶元年。截至民國二十年止。嗣既改爲重修。其歲時則上溯唐虞。下訖民國二十一年年底截止。惟電話、匪賑、三項。關係重要。權爲少延。餘概不贅。

一 正陽地圖。舊無精製。茲延聘測繪專家蕭君屏亞。原擬實地測繪。力圖精確。嗣以水災匪患。經濟拮据。未能實踐。只得於縣總圖及各區分圖。參酌自治保甲各圖。依樣描摹。四大鎮圖。則由蕭君親往各鎮。觀察大勢。繪之。故距離方位。間未準確。亦勢所難免。

一 正陽縣爲古愼國。創建莫稽。其發現。一見於史記。周成王既定淮徐東彝。息愼來賀。王命榮伯作賄息愼之命。（按今息縣爲古息國。正陽爲古愼國。疆土緊相連貫。位於淮徐上游。其於定淮後。來賀內附。情勢適合。或誤疑息愼爲肅愼。是不知淮西有此息愼二國。而臆猜也。）一見於左傳魯哀公十六年吳人伐愼。舊志第謂在周爲沈國地。殆因仍舊說。係就縣東北傍汝一帶。概言之。而未見及此。茲特